

RIALACHÁN TARMLIGTHE (AE) 2022/1622 ÓN gCOIMISIÚN
an 17 Bealtaine 2022

lena bhforlíontar Rialachán (AE) Uimh. 575/2013 ó Pharlaimint na hEorpa agus ón gComhairle maidir le caighdeáin theicniúla rialála i ndáil le margáí éiritheacha agus geilleagair shárffhorbartha

(Téacs atá ábhartha maidir le LEE)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) Uimh. 575/2013 ó Pharlaimint na hEorpa agus ón gComhairle an 26 Meitheamh 2013 maidir le ceanglais stuamachta i gcomhair institiúidí creidmheasa, agus lena leasaítear Rialachán (AE) Uimh. 648/2012 ⁽¹⁾, agus go háirithe Airteagal 325ap(3), an tríú fomhír, de,

De bharr an mhéid seo a leanas:

- (1) Leis na ceanglais cistí dílse maidir le priacal margaidh faoin gcur chuige caighdeánaithe malartach a leagtar amach in Airteagal 325c go hAirteagal 325ay de Rialachán (AE) Uimh. 575/2013, ceanglaítear, chun an ceanglas cistí dílse a ríomh de réir an mhodha íogaireacht-bhunaithe a leagtar amach in Airteagal 325d go hAirteagal 325k, cur i bhfeidhm na n-ualuithe priacail le haghaidh priacal margaidh a shonraítear i dTábla 8 d'Airteagal 325ap den Rialachán sin de bhun an ghnímh tharmligthe dá dtagraítear in Airteagal 461a. Maidir le margáí ar geilleagair shárffhorbartha agus margáí éiritheacha iad, ós rud é gur catagóirí comheisiatacha iad, ba cheart a shoiléiriú gur cheart na margáí uile nach geilleagair shárffhorbartha iad a mheas mar mhargáí éiritheacha.
- (2) Agus cinneadh á dhéanamh faoi cé acu margáí ar geilleagair shárffhorbartha iad agus cé acu margáí ar margáí éiritheacha iad, is gá, ar thaobh amháin, cothrom iomaíochta a áirithiú agus, ar an taobh eile, cur chuige priacalbhunaithe a bhunú. I ndáil leis sin, meastar gurb é an réiteach is iomchuí an liosta tíortha ar geilleagair shárffhorbartha iad a shonrú i bhfianaise an chuir chuige a lean Coiste Basel um Maoirseacht ar Bhaincéireacht (CBMB) agus i bhfianaise an ghá cur chun feidhme comhchoiteann a bhaint amach maidir le modheolaíocht ríofa na gceanglas gaolmhar priacail margaidh sna Ballstáit uile. Cé gur cheart caighdeáin idirnáisiúnta CBMB a chur san áireamh, ba cheart a shonrú gur geilleagair shárffhorbartha seachas geilleagair margáí éiritheacha iad margáí na mBallstát nach bhfuil chomh luaineach céanna leis na margáí a shainaithnítear mar gheilleagair shárffhorbartha i gcomhréir leis na caighdeáin idirnáisiúnta sin. Thairis sin, le geilleagair shárffhorbartha agus geilleagair margáí éiritheacha a chinneadh, ba cheart aird chúí a thabhairt ar mhargadh inmheánach a bhunú san Aontas, ar láithreach an Limistéir Eorpaigh Eacnamaíoch, agus ar na sainiúlachtaí a bhaineann le tíortha agus críocha thar lear de chuid roinnt Ballstát.
- (3) Tá an Rialachán seo bunaithe ar na dréachtchaighdeáin theicniúla rialála a chuir an tÚdarás Baincéireachta Eorpach faoi bhráid an Choimisiúin.
- (4) Rinne an tÚdarás Baincéireachta Eorpach comhairliúcháin phoiblí oscailte a réachtáil maidir leis na dréachtchaighdeáin theicniúla rialála ar a bhfuil an Rialachán seo bunaithe, rinne sé anailís ar na costais agus ar na sochair a d'fhéadfadh a bheith ag baint leo ann agus d'iarr sé comhairle ón nGrúpa Geallsealbhóirí Baincéireachta arna bhunú i gcomhréir le hAirteagal 37 de Rialachán (AE) Uimh. 1093/2010 ó Pharlaimint na hEorpa agus ón gComhairle ⁽²⁾,

⁽¹⁾ IO L 176, 27.6.2013, lch. 1.

⁽²⁾ Rialachán (AE) Uimh. 1093/2010 ó Pharlaimint na hEorpa agus ón gComhairle an 24 Samhain 2010 lena mbunaítear Údarás Maoirseachta Eorpach (An tÚdarás Baincéireachta Eorpach), lena leasaítear Cinneadh Uimh. 716/2009/CE agus lena n-aisghairtear Cinneadh 2009/78/CE ón gCoimisiún (IO L 331, 15.12.2010, lch. 12).

TAR ÉIS AN RIALACHÁN SEO A GHLACADH:

Airteagal 1

Geilleagair shárfhorbartha agus margáí éiritheacha

1. Chun ualuithe priacail a shonrú le haghaidh na n-íogaireachtaí ar fhachtóirí priacal maidir le rátaí cothromais agus rátaí athcheannaigh cothromais i gcomhréir le hAirteagal 325ap de Rialachán (AE) Uimh. 575/2013, beidh na tíortha seo a leanas ina ngeilleagair shárfhorbartha:

- (a) Ballstáit an Aontais Eorpaigh;
- (b) na tíortha agus na críocha thar lear a bhfuil caidreamh speisialta acu leis an Danmhairg, leis an bhFrainc nó leis an Ísiltír, lena n-áirítear Oileáin Fharó agus na tíortha agus na críocha sin a liostaítear in Iarscríbhinn II a ghabhann leis an gConradh ar Fheidhmiú an Aontais Eorpaigh;
- (c) na tríú tíortha seo a leanas:
 - (i) tríú tíortha, ar páirtithe iad sa Chomhaontú maidir leis an Limistéar Eorpach Eacnamaíoch;
 - (ii) an Astráil;
 - (iii) Ceanada;
 - (iv) Hong Cong;
 - (v) an tSeapáin;
 - (vi) Meicsiceo;
 - (vii) an Nua-Shéalainn;
 - (viii) Singeapór;
 - (ix) an Eilvéis;
 - (x) an Ríocht Aontaithe;
 - (xi) na Stáit Aontaithe.

2. Chun ualuithe priacail a shonrú le haghaidh na n-íogaireachtaí ar fhachtóirí priacal maidir le rátaí cothromais agus rátaí athcheannaigh cothromais faoi Airteagal 325ap de Rialachán (AE) Uimh. 575/2013, beidh na tíortha nach liostaítear i mír 1 den Airteagal seo ina margáí éiritheacha.

Airteagal 2

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, 17 Bealtaine 2022.

Thar ceann an Choimisiúin
An tUachtarán
Ursula VON DER LEYEN